

佛說大方廣師子吼經

唐中天竺沙門地婆訶 等奉勅譯

如是我聞一時薄伽梵在日月宮中勝藏殿
上與大比丘衆九十百千俱胝及無量菩薩
摩訶薩俱爾時佛告勝積菩薩北方去此六
十恒河沙佛上俱胝那由他百千微塵等刹
有世界名曰歡樂佛號法起如來應正等覺
現在說法以立持安普利一切今欲說大方
廣名師子吼難遇難聞汝可詣彼聽受法要
爾時勝積菩薩受佛教已即往歡樂世界見
法起佛頂禮雙足右遶七匝却住一面時法
起佛見勝積菩薩知而故問作如是言善男
子汝從何來時勝積菩薩居心而住默無言
說天龍夜叉乾闥婆阿脩羅迦樓羅緊那羅
摩睺羅伽人非人等普大會衆咸作是念勝

積菩薩三界尊問如何默然不答居心而住
爾時佛以脩廣明朗青蓮華目師子嚙申普
視十方知大衆疑便現微笑放大金光其光
間錯無量百千種種異色普照十方一切國
土地大震動是時十方諸菩薩衆見此神變
種種形色種種儀服來詣佛所頂禮佛足各
以已福莊嚴蓮藏坐蓮華座爾時電鬘菩薩
從座而起偏袒右肩右膝著地合掌向佛歡
喜奇特得未曾有白佛言世尊我昔曾見無
量神變未有光明地震如今所覩善哉世尊
願說因緣何故微笑惟垂悲愍決此衆疑爾
時電鬘菩薩以偈請曰
大悲大導師 微笑非無因 願佛利衆生
垂哀決定說
爾時法起如來端嚴赫奕閻浮檀金暉煥照

朗散注無量百千俱胝那由他微妙光明如
大金柱電鬘菩薩白佛言世尊我見無量神
通光明未若今日昔所不覩佛告電鬘如是
如是此大光明神通如來希現非大因緣不
示此相諦聽諦聽善思念之當爲汝說微笑
因緣汝勿驚怖勿餘怖望堅固汝心勿生疑
惑所以者何諸佛境界不可思議願力神通
不可思議汝深思此慎無疑惑電鬘汝見勝
積菩薩釋迦牟尼佛使來者不電鬘言見善
男子此勝積菩薩我問汝從何來居心默然
而不答我我見此事故現微笑如來問而不
答今此會衆咸生疑怪善男子勝積菩薩作
如是解一切諸法無來無去云何世尊而問
我言汝從何來彼知諸法無有言說處不可
得云何而得言所從來善男子此已略說諸

良三

十七

法實相善男子勝積菩薩於一切法中無字
無說字性離故諸法無出出性離故諸法無
趣趣正斷故諸法無現無所依故超心意識
離諸因緣無名無言無作無示過眼等路無
所積聚無生離想無有處所離諸處所法唯
一字所謂無字本無言說何所言說善男子
當知無說是爲真說爾時淨身菩薩承佛神
力白佛言世尊若無所說是真說者瘖默不
言皆應說法佛言如是善男子如汝所言非
唯瘖默說法不瘖默者亦皆說法而不知法
淨身菩薩白佛言世尊惟願顯說云何一切
衆生說法而不知法佛告淨身菩薩善男子
如生盲人處日光中而不見日傍人爲說以
他聲故乃知有日如是諸法悉入法界法
界無字離諸字性非諸衆生所能宣辯以因

緣故而有言說如幽谷響谷空無聲以因緣故有響聲起如是善男子因緣和合字聲顯現而衆生界空無有字善男子衆生所有音聲語言當知皆入四無礙智以言說者斯入法無礙智非言說者斯入義無礙智以言分割斯入辭無礙智與事相應決了無滯斯入善說無礙智衆生所有言說當知皆悉入此四法句中真實義句本來不動如彼生盲隨他言執非真實見是故善男子欲求法者於自身求欲求菩提以五蘊求說此實義句時三千大千世界普六震動大光徧照佛出廣長舌相徧覆三千大千世界從其舌相放無量俱胝那由他百千光明從大地獄上至有頂一切世界光明徧照還攝舌相普告大會汝等當知如來廣長舌相由實語得如來所

說應當敬受起真實信勿懷猶豫而生疑惑爾時十地菩薩等衆并天龍夜叉乾闥婆阿脩羅迦樓羅緊那羅摩睺羅伽人非人等一切大會俱從座起合掌同聲而白佛言惟願世尊說如實義唯願善逝說如實義我等今者惟憐如來所證之法不憐餘法我等大衆咸無疑惑爾時世尊再三觀覽一切大會作如是言我爲悲愍一切世間利益安樂多衆生故以法財利安諸天人是以前說大師子吼善男子汝等當知娑婆世界釋迦牟尼如來應正等覺現在說法以立持安度衆生者彼即是我法起如來我於娑婆世界作種種形饒益衆生隨其所宜如應度脫是時大會聞說此語咸生奇特歡喜踊躍得未曾有同聲唱言善哉善哉世尊欲令一切衆生吼師

子吼故爲大會說師子吼真實之法若得聞者當知是人善根不少況復受持讀誦廣宣流布種種華鬘種種衣物幢幡懺蓋燒塗糝香恭敬供養斯人則爲一切諸佛之所攝護爾時佛讚諸菩薩言善哉善哉善男子如汝所言是善男子善女人等功德不少此佛真實師子吼法若聞淨心乃至一稱善哉者我皆攝護亦爲彌勒之所顧召斯人兩肩擔我菩提於五濁中信受此經生生之處我當成熟亦爲彌勒之所攝護此人當能乾竭生死海降伏衆魔銷諸煩惱擊大法鼓永離女身摧諸怨障息衆結聚若有善男子善女人經十阿僧祇三千大千世界微塵等劫以一切樂具供養供給一切如來若聞此經真實神通懷疑不信斯人則於佛所有過不名真實

良三

十九

供養諸佛若有善男子聞說如來此真實德淨信稱歎比前功德過百千倍斯人則爲真實供養善男子汝等若於我所心淨信者當好書寫受持此經此經所在之處諸佛遊止爾時勝積菩薩電鬘菩薩常光菩薩淨眼菩薩彌勒菩薩作無畏菩薩觀自在菩薩大勢至菩薩文殊師利菩薩辯積菩薩辯勇菩薩除一切障菩薩作光菩薩普賢菩薩如是上首八十四俱胝那由他百千菩薩摩訶薩俱白佛言世尊我等於後末時當廣流布如是經典令諸衆生悟大涅槃世尊若不久植善根如是之經不入其耳若有受持此經廣流布者歎其功德於百千俱胝那由他劫不可窮盡爾時世尊告諸菩薩言善哉善哉汝等應當如是尊重佛教受持正法佛說此經已

勝積菩薩并諸天人阿脩羅乾闥婆等普大會衆歡喜奉行

佛說大方廣師子吼經

良三

12

音釋

懣	蘇	也	麴
張	沒切	此云方墳	古猛切
懣	音堵	音窳	鏤
懣	音窳	觀	落候切
懣	懣時戰切	叟	雕刻也
懣	量遮也	厖	正作塼
懣	昌兩切	隙	食尹切
懣	剖折也	綽	綽也
懣	普后切	踰	波語